

# 《無量壽經優婆提舍願生偈》 補充講表

◎附表七：以下糅合曇鸞大師《往生論註》、江味農居士《金剛經講義》

○四、觀察門※《靈峰宗論》卷第九之二。【戒心戒方銘】云：「若要熟處漸生，先須生處漸熟。」

※《金剛經講義》云：「淨土法門之妙，在改變眾生之心。而觀想極樂世界之六塵，即不

住空；由此而脫離五濁之六塵，即不住有。故佛法治心，不重降伏而重轉移；使

眾生心轉向佛境之六塵，即脫離五濁之六塵。二邊不著之下手方法，即在此。」

○《往生論註》云：「彼過三界有何相？下十六種莊嚴功德成就是也。」

◆一者、量：究竟如虛空，廣大無邊際故。

既知量，此量以何為本，是故觀性，性是本義。彼淨土，從正道大慈悲，出世善根生。

既言出世善根，此善根生何等相？是故次觀莊嚴形相。

既知形相，宜知形相何等體，是故次觀種種事。

既知種種事，宜知種種事妙色，是故次觀妙色。

既知妙色，此色有何觸？是故次觀觸。

既知身觸，應知眼觸，是故次觀水、地、虛空莊嚴三事。

既知眼觸，應知鼻觸，是故次觀衣華香薰。

既知眼鼻等觸，須知離染，是故次觀佛慧明照。

既知慧光淨力，宜知聲名遠近，是故次觀梵聲遠聞。

既知聲名，宜知誰為增上，是故次觀主。

既知有主，誰為主眷屬，是故次觀眷屬。

既知眷屬，宜知此眷屬若為受用，是故次觀受用。

既知受用，宜知此受用有難無難，是故次觀無諸難。

既知無諸難，以何義故無諸難，是故次觀大義門。

既知大義門，宜知大義門滿不滿，是故次觀所求滿足。

◆復次，此十七句，非但釋疑；觀此十七種莊嚴成就，能生真實淨信，必定得生彼安樂佛土。」

○是故願生彼，阿彌陀佛國。（以下糅合太虛大師《往生淨土論講要》）

◆成佛既非一生所能，而已發大乘心者須修六度，修六度時，時有種種退墮破壞大乘心之違緣，有失壞大乘心之危險；而人命短促，旦夕無常到來，或上升樂趣，或下沉苦趣，又有迷失大乘心（菩提心）之危險。因有如是種種惡緣，菩薩雖已發大乘心而欲保持不退者，實非易事！諸佛有護念菩薩之責，《金剛經》云：【如來善護念諸菩薩】。對此已發大乘心而未能不退之菩薩，究以何法慈悲護念，而使其已發之大乘心不致有失壞退墮之危險？因此諸佛以欲護念如此已發大乘心未能不退之菩薩故，遂安立清淨莊嚴之國土。菩薩於何土有緣，即發願往生何土，隨所發願，起決定信，專一其心。則臨命終時，隨其所願而往生淨土，聞法不退；而還來普度一切眾生。若無諸佛安立淨土為已發大乘心菩薩之所依歸，一旦退失，則前所修之布施、持戒、忍辱、精進、禪定、智慧之種種功德，唐喪無益。故菩薩必以淨土為歸宿，方不致退失大乘心（菩提心）而唐捐其前功

也。此為阿彌陀佛及十方諸佛成立淨土之正義，亦即釋迦說此淨土法門之真義所在。修學淨土法門者，須於此義深切了解注意之！眾生所願樂，一切能滿足。故我願往生，阿彌陀佛國！

○無量大寶王，微妙淨華臺。（以下糅合《往生論註》）

◆此二句，名莊嚴座功德成就。佛本何故莊嚴此座？見有菩薩，於末後身敷草而坐，成阿耨多羅三藐三菩提。人天見者，不生增上信，增上恭敬，增上愛樂，增上修行，是故願言：我成佛時，使無量大寶王，微妙淨華臺以為佛座。

無量者，如《觀無量壽佛經》言：「欲觀彼佛者，當起想念，於七寶地上，作蓮華想。

#### 一、華色數量

令其蓮華，一一葉上，作百寶色；有八萬四千脈，猶如天畫；一一脈有八萬四千光，了了分明，皆令得見。華葉小者，縱廣二百五十由旬。如是蓮華，具有八萬四千葉。

一一葉間，有百億摩尼珠王（大寶王），以為映飾；一一摩尼珠，放千光明；其光如蓋，

七寶合成，徧覆地上。（二、葉間珠光）

釋迦毗楞伽摩尼寶，以為其臺。此蓮花臺，八萬金剛甄叔迦寶，梵摩尼寶，妙真珠網，以為校飾。（三、華臺寶網）

於其臺上，自然而有四柱寶幢，一一寶幢，如百千萬億須彌山，幢上寶幔，如夜摩天宮，復有五百億微妙寶珠，以為映飾；一一寶珠，有八萬四千光；一一光，作八萬四千異種金色。（四、寶幢莊嚴）

一一金色，徧其寶土，處處變化，各作異相：或為金剛臺，或作真珠網，或作雜華雲；於十方面，隨意變現，施作佛事。」（五、隨機利物）

○相好光一尋，色像超群生。（以下糅合《往生論註》）

◆此二句，名莊嚴身業功德成就。佛本何故莊嚴如此身業？見有佛身，受一丈光明，於人身光，不甚超絕。如轉輪王，相好亦大同；提婆達多，所減唯二，致令阿闍世王以茲惑亂。刪闍耶等敢如螳螂，或如此類也，是故莊嚴如此身業。

※《大智度論》卷二十九云：「問曰：佛畢竟斷眾生相，無我相，具足空法相；何以故以相莊嚴，如取相者法？答曰：若佛但以妙法莊嚴其心，身無相好者，或有可度眾生，心生輕慢！謂佛身相不具，不能一心樂受佛法。譬如以不淨器盛諸美食，人所不喜；如臭皮囊盛諸寶物，取者不樂。以是故，佛以三十二相莊嚴其身。」

復次，佛常於大眾中作師子吼言：我於眾生中，一切功德最為第一！若佛生身不以相好莊嚴，或有人言：身形醜陋，何所能知！佛以三十二相、八十隨形好莊嚴其身，眾生猶有不信，何況不以相好莊嚴！」

※《觀無量壽佛經》言：「佛身高六十萬億那由他恒河沙由旬。彼佛圓光，如百億三千大千世界。於圓光中，有百萬億那由他恒河沙化佛；一一化佛，亦有眾多無數化菩薩，以為侍者。無量壽佛，有八萬四千相；一一相中，各有八萬四千隨形好；一一好中，復有八萬四千光明；一一光明，徧照十方世界念佛眾生，攝取不捨。其光相好，及與化佛，不可具說。但當憶想，令心眼見。」